

1.Uvod

Bosanska Krupa je općina u sjeverozapadnom dijelu Bosne i Hercegovine, odnosno Federaciji Bosne i Hercegovine. Pripada Unsko-Sanskom kantonu uz ostalih 6 općina. Smještena je u dolinama rijeka Une i Krušnice. Najveći dio grada razvio se na niskom prevoju između brda Huma i Starog grada na nadmorskoj visini od 176 m. u proširenom dijelu rijeke Une.



Općina Bosanska Krupa graniči sa općinama: Bihać, Cazin, Bužim, Bosanski Petrovac, Sanski Most, Bosanski Novi, te Dvor u Republici Hrvatskoj. Rijeka Una, jedna od najljepših rijeka u Bosni i Hercegovini, prolazi kroz centar Bosanske Krupe. Putnim komunikacijama grad je povezan sa Zapadnom i Južnom Evropom.

Bosanska Krupa danas zauzima prostor od 556 km². Prema popisu stanovništva iz 1991. općina Bosanska Krupa imala je 58.212 stanovnika, a danas je taj broj smanjen i iznosi 32.465 stanovnika. Sam grad Bosanska Krupa danas ima oko 15.400 stanovnika.

Sport se u općini Bosanska Krupa organizuje, planira i finansira u skladu sa Zakonom o sportu USK. Sredstva za zadovoljavanje potreba Sportskog saveza obezbjeđuju se iz općinskog budžeta, a raspoređuju se prema postojećem Pravilniku o raspodjeli sredstava, na osnovu kojeg se donosi i finansijski plan.

U skladu sa postojećim Zakonom klubovima i udruženjima su date mogućnosti da prihode ostvaruju i od drugih izvora, a to su: članarine, donacije, sponzorstva, zakupnine od igara na sreću itd.

Nosioci razvoja sporta u općini Bosanska Krupa su 33 sportske organizacije (klubovi i udruženja), članice Sportskog saveza, koje organizovano djeluju i rade u 18 sportskih grana takmičarskog sporta, sportske rekreacije, školskog sporta, invalidnog sporta i ostalih sportova.